



Siverth K. Heilmann

UPA 2024/115

Atassut

24. April 2024

Imeruersaatit puuinut akitsuutip peernissaa pillugu Naalakkersuisut UKA2024-mut inatsisissamik saqqummiussaqaqqullugit peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Siullermik Inatsisartuni ilaasortaq Aqqalu C. Jerimiassen qujaffigerusuppara aalajangiiffigisassatut siunnersuutaanut, Atassummiillu naatsumik oqaaseqarfigissavara.

Tamatta eqqaamasariaqarparput, neriorsuutit qineqqusaarutillu akeqarmata. Neriorsuinerpaaq qineriarlugu akitsuutinut naammagittaalliortuarniarutta politikkimut paasinnittaaserput suli inerisaqqittariaqarsimassavarput.

Eqqumiitsuali tassaavoq, nunarsuarmi pisiassat akiisa qaffakkiartuaarneranni, aningaasallu naleerukkiartuaarneranni Naalakkersuisut ulluinnarni nioqqutissanut akitsuusersuimmata. Eqqaamaneqarsimangippallu eqqaasitsissutigiinnassavara, massakkut Naalakkersuisuusut qineqqusaarutigini kuusaat tassaammat inuuniarnermut oqilisaassinisaaq. Inuillu kaasarfiiniit aallertoqassanngitsoq.

Siunnersuuteqartumullu isumaqataavugut, inuuniarneq, ulluinnarnilu nioqqutissat akikinnerulissappata akitsuutinik piiasariaqarpugut. Nuannaarutigaarputtaaq illuatungiliuttoqatitta akitsuuterparujussuit eqqunnikuusatik massakkut aamma piiarniarlugit sukataaqataalersimmata.

Akileraarut taamak qaffasitsigisoq, illuatungaanilu iluamilluunniit nakorsiarnisaaq ajornakusooreertigisoq akitsuutit peqqinnerulersinnaviangilaatigut, inuillu isumalluarlutik neriuuteqarlutillu qinersiartornikunut artukkarsuutaaginnassanngippata massakkut neriorsuutisi eqquutsittariaqarpasi.

Siunnersuutigaaralu sulinermit ilanngaat peerlugu aningaasat amigartoorutaasussaagaluartut matussusersinnaasut. Akitsuusersuinermit una tassaaginnarpoq aningaasanik arsaarinneriarluni utertitsineq.

Taamatut naatsumik oqaaseqarlunga Atassummiit siunnersuut taperserlugu akitsuutinut ataatsimiititaliamut innersuupparput.

Qujanaq